

**BOSNA I HERCEGOVINA
FEDERACIJA BOSNE I HERCEGOVINE
SREDNJOBOSANSKI KANTON
OPĆINA BUGOJNO**

**DOKUMENT OKVIRNOG BUDŽETA OPĆINE
BUGOJNO ZA PERIOD 2020.-2022. GODINU**

Bugojno, juni 2019. godine

SADRŽAJ

1. Uvod.....	2
2. Smjernice ekonomske i fiskalne politike za period 2020-2022 godine.....	4
3. Srednjoročna makroekonomska prognoza i fiskalna strategija Bosne i Hercegovine, Federacije BiH i Srednjobosanskog Kantona (SBK)	7
3.1. Makroekonomske projekcije BiH za period 2018. - 2022. g.	7
3.2. Makroekonomske projekcije FBiH za period 2019. - 2022. g.	10
3.3. Makroekonomske projekcije za SBK za period 2019.-2022.	12
4. Projekcije Budžeta Općine Bugojno za period 2020.-2022.	18
4.1. Projekcije prihoda za period 2020.-2022.....	18
4.2. Projekcije rashoda i izdataka po ekonomskoj i funkcionalnoj klasifikaciji za period 2020.-2022.	22
4.3. Pregled programa aktivnosti budžetskog korisnika, Jedinstvenog organa uprave sa potrošačkim jedinicama za period 2020-2022. godinu	27
5. Mjere i preporuke za upravljanje prihodima i rashodima u Općini Bugojno ...	29

1.Uvod

U skladu sa Zakonom o Budžetu FBiH (Službene novine FBiH, br. 102/13, 9/14, 13/14, 8/15, 91/15, 102/15, 104/16, 5/18, 11/19) urađen je dokument okvirnog Budžeta Općine Bugojno za period od 2020. do 2022. godine (skraćeno: DOB) koji služi kao polazna osnova za izradu Nacrta Budžeta za 2020. godinu i koji sadrži projekcije Budžeta Općine Bugojno za 2020., 2021. i 2022. godinu.

Dokument okvirnog budžeta (DOB) predstavlja kratkoročnu i srednjoročnu ekonomsku i fiskalnu prognozu za društveno-ekonomsko okruženje, a u okviru kojeg se projicira ekonomski i fiskalni položaj općine u trogodišnjem periodu.

Smjernice ekonomske i fiskalne politike za trogodišnji period sa viših nivoa vlasti (SBK i FBiH) trebaju biti objavljene i osnova su za izradu dokumenta okvirnog Budžeta.

Zakonom o budžetima u FBiH („Sl.novine Federacije BiH“, br.102/13, 9/14, 13/14, 8/15, 91/15, 102/15, 104/16, 5/18, 11/19), propisan je budžetski kalendar kojim su utvrđeni krajnji rokovi za svaku fazu budžetskog planiranja i kojim je predviđeno da DOB, kao jedinstven dokument, vlada odnosno općinski načelnik razmatra i usvaja do 30. juna tekuće godine.

Teškoća za primjenu ovako definisanih zakonskih odredbi predstavlja činjenica da su Zakonom o budžetima u FBiH definisane iste procedure i rokovi za pripremu budžetskih dokumenata za sve nivoe vlasti, zatim da se u fazi pripreme navedenih dokumenata treba bazirati na smjernicama ekonomske i fiskalne politike viših nivoa vlasti koje općine ne dobivaju u periodu pripreme svojih budžetskih dokumenata, odnosno činjenica je da se nisu dostavile smjernice za naredne tri godine sa viših nivoa vlasti (FBiH, SBK) u roku ili se nisu ni dostavile kako je predviđeno Zakonom o Budžetu FBiH.

Imajući u vidu navedeno, izrada Dokumenta okvirnog Budžeta općine Bugojno za period 2020.-2022. se temelji na slijedećim dokumentima/informacijama:

- Dokument okvirnog budžeta Federacije BiH za period 2019.-2021. (elektronska verzija dokumenta; Sarajevo, objava: juni 2018. godine);
- Dokument okvirnog Budžeta SBK za period 2019.-2021. (elektronska verzija dokumenta; Travnik, objava: juli 2018. godine);
- Procjenama i projekcijama prihoda Srednjobosanskog kantona za 2019. godinu i za period 2020.-2022. godine (dostavljeno Općini Bugojno od ministarstva finansija SBK, 22 maj 2019),

- Smjernicama ekonomske i fiskalne politike FBiH za period 2020-2022. godine (Sarajevo maj 2019. godine)
- Projekcijama prihoda od indirektnih poreza za razdoblje 2020.-2022. godine objavljenim od strane Odjeljenja za makroekonomsku analizu Uprave za indirektno oporezivanje,
- Statističkim podacima objavljenim u Statističkom godišnjaku i mjesečnim statističkim pregledima Federacije Bosne i Hercegovine za 2018. god. (Federalni zavod za statistiku, Sarajevo, januar 2019. godine),
- Statistički podaci od Federalnog zavoda za programiranje razvoja.
- Zahtjevima Općinskih službi (korisnika) za finansiranje za period 2020-2022. godinu
- Nacrt strategije razvoja Općine Bugojno za period 2011.-2020. godine

Procjena prihoda za Općinu Bugojno za period 2020.-2022. godine je urađena po osnovu istorijskog principa (izvještaja o izvršenju budžeta Općine za tekuću godinu i prethodne godine) i dostavljenim projekcijama poreznih prihoda od ministarstva finansija SBK za Općinu Bugojno za period 2020.-2022. godine.

Važno je imati u vidu da DOB, kao okvirni dokument za donošenje Budžeta, predstavlja osnovu za planiranje godišnjeg budžeta i nije limitirajući faktor planiranja prihoda i izdataka prilikom donošenja dokumenata Budžeta, ali treba predstavljati gornju granicu rashoda za trogodišnji period prilikom pripreme budžetskih dokumenata iako je, uzimajući u obzir trenutne okolnosti, gotovo nemoguće postići identične vrijednosti projiciranih DOB-om i nacrtom, odnosno prijedlogom budžeta.

2. Smjernice ekonomske i fiskalne politike za period 2020-2022 godine

Savremena makroekonomska politika sastoji se od kombinacije mjera iz više segmenata: ekonomske, monetarne, politike platnog bilansa, dohodaka, cijena, te fiskalne politike. Fiskalna politika se može definisati kao svjesna promjena prihoda i rashoda kojima je svrha ostvarivati makroekonomske ciljeve ekonomske politike, poput pune zaposlenosti, stabilnih cijena, zadovoljavajuće stope privrednog rasta i ostvarenja eksterne ravnoteže. Pod fiskalnom politikom podrazumijeva se ponajprije upravljanje budžetskim prihodima u svrhu finansiranja javnih rashoda. Cilj je postići privredni rast uz istovremeno visoku zaposlenost i nisku inflaciju, a isti je u potpunosti ostvariv jedino uz kombinaciju instrumenata fiskalne politike.

Svrha smjernica ekonomske i fiskalne politike je prvenstveno definisati smjer i ciljeve ekonomske i fiskalne politike, kao i visinu finansijskih planova budžetskih i vanbudžetskih korisnika, s fokusom na dalju provedbu fiskalne konsolidacije i politike smanjenja/ograničavanja javne potrošnje na svim nivoima vlasti u BiH. Smjernice trebaju da sadrže: Strateške ciljeve ekonomske i fiskalne politike, Osnovne makroekonomske pokazatelje, Osnovne pokazatelje ekonomske i fiskalne politike, pretpostavke društvenog i privrednog razvoja za fiskalnu i za slijedeće 2 godine, Procjenu prihoda budžeta i predviđene promjene javnog duga i strategiju upravljanja dugom. Cilj Smjernica jeste uputiti djelovanje federalnih i kantonalnih ministarstava i institucija, te jedinica lokalne samouprave na politike i aktivnosti koje će najviše doprinijeti ostvarenju definisanih strateških ciljeva.

Bosna i Hercegovina je, prema prvim procjenama, u 2018. godini ostvarila ekonomski rast od 3,3% u odnosu na 2017. godinu, potaknut jačanjem domaće potražnje i povoljnim kretanjima u međunarodnom ekonomskom okruženju. Najznačajniji rast je, kao i u prethodnom periodu, ostvaren u domenu privatne potrošnje i investicija, dok je doprinos neto izvoza bio neutralan. Prema preliminarnim procjenama, a na osnovu objavljenih saopćenja Federalnog zavoda za statistiku za četiri kvartala 2018. godine, BDP Federacije BiH je u 2018. godini iznosio 21,2 mlrd. KM i realno je veći za 3,5% u odnosu na 2017. godinu.

U Bosni i Hercegovini se u 2019. godini očekuje nastavak trenda ekonomskog rasta, iako bi stopa rasta trebala biti neznatno niža nego u 2018. godini, imajući u vidu usporavanje ekonomskog rasta u Evropskoj uniji. Tako se u 2019. godini očekuje rast od 3,1%,

potaknut rastom potrošnje (javne i privatne), te investicija. Na tržištu rada u BiH se u narednom srednjoročnom periodu očekuje daljnje smanjenje stope nezaposlenosti, odnosno porast broja zaposlenih lica. Projekcije su određene poslovnim ambijentom u BiH, odnosno u regiji, uz pretpostavku povećanog obima poslovnih aktivnosti. U periodu od 2019-2022. godine u Federaciji BiH se očekuje rast BDP-a po stopama od 3,7%, 3,8%, 4,0% i 4,2%, respektivno. Uz ovakve uslove, u BiH se očekuje i rast prosječne neto plate koja bi se u periodu od 2020 – 2022. godine mogla uvećati za 3,2%- 3,4%.

Uzimajući u obzir da vanjsko okruženje predstavlja glavnu strukturnu odrednicu većine ekonomskih kretanja u BiH ono isto tako predstavlja i potencijalni izvor rizika po domaća ekonomska kretanja. Eskalacija globalnih izazova kao što su trgovinski ratovi, pregrijavanje američke ekonomije, slabljenje rasta u Aziji, kao i pitanja Brexit-a zasigurno bi se odrazila na ekonomski rast u EU u vidu usporavanja, odnosno slabljenja istog. To bi u konačnici rezultiralo slabljenjem izvozne potražnje, odnosno usporavanjem prosječne stope rasta robnog izvoza, te bi imalo negativan uticaj na priliv kapitala, posebno uzevši u obzir da zemlje EU predstavljaju ključni izvor za eksterno finansiranje u BiH. Pored navedenog, kretanja svjetskih cijena, posebno nafte i u određenoj mjeri metala, mogli bi imati negativan uticaj na domaća ekonomska kretanja. Pored eksternih, potencijalni rizik za ostvarivanje makroekonomskih projekcija predstavljaju i rizici internih dinamika. Osnovni interni rizik koji bi mogao imati negativan uticaj na ekonomski rast vezan je za proces formiranja vlasti i nastavak reformskih procesa. Eventualna kašnjenja u procesu provedbe ekonomskih reformi bi se odrazila na kretanje finalne potrošnje i investicija, što bi dovelo do usporavanja rasta. Rizik u srednjem roku predstavlja i migracija stanovništva, koja prijeti smanjenju produktivnosti, a samim time i projiciranom ekonomskom rastu.

Fiskalna politika u 2019. godini i u narednom srednjoročnom periodu treba biti fokusirana na podršci makroekonomskom rastu, u cilju povećanja fiskalnog prostora politikama koje promovišu dugoročni rast i suzbijanje sive ekonomije. Ključne aktivnosti prvenstveno podrazumijevaju djelovanje u pravcu stvaranja povoljnog i stabilnog poslovnog okruženja, atraktivnog za povećan priliv i domaćih i stranih investicija, kao glavnog generatora prognoziranog srednjoročnog makroekonomskog rasta. Konsolidirani plan prihoda u budžetu Federacije BiH za 2020. godinu iznosi 9.419 mil. KM i prati projicirani rast BDP-a FBiH od 3,8% u odnosu na prethodni period. U narednim godinama očekivan je nastavak trenda rasta prihoda prosječno za 3,7% sa nešto nižim

rastom ukupnog konsolidiranog iznosa u 2021. godini u odnosu na makroekonomska kretanja. Ukupan okvir prihoda kantonalnih i općinskih/gradskih budžeta i javnih prihoda ostalih korisnika na kantonalnom nivou u periodu 2020-2022. godina projiciran je sa prosječnim rastom od približno 4,0% i prati prognozirane makroekonomske trendove na nivou BiH i FBiH.

Kontrola trošenja i dodjele javnih sredstava kroz transfere, odnosno subvencije bi se trebala pojačati implementacijom programskog budžetiranja na nivou Federacije BiH i u svih deset kantona, planiranoj za 2019. godinu. Stabilna fiskalna politika kroz smanjenje javne potrošnje je polazna osnova djelovanja po pitanju provedbe politike upravljanja javnim rashodima. Preporuka je za sve nivoe vlasti provođenje restriktivne javne potrošnje u periodu 2020-2022. godina, s ciljem održavanja stabilnog finansijskog sistema i budžetske ravnoteže, te jače kontrole javne potrošnje. Pri tome će ključni naglasak biti na strogoj kontroli budžetske potrošnje, odnosno ograničavanju rasta tekuće potrošnje i tekućih transfera. Provedba navedenih mjera i aktivnosti, uz fokus na nastavak provođenja mjera smanjenja ukupnih rashoda i izdataka, i zajedno sa efektima poreznih politika, omogućit će stvaranje fiskalnog prostora za javne investicije i kapitalne projekte, što će u konačnici pridonijeti jačanju stabilnosti javnih finansija na svim nivoima vlasti.

Također, bitno je napomenuti da za kreiranje fiskalnih i razvojnih politika od izuzetnog značaja je i sagledavanje stanja i projekcije javnog duga. Da bi se održala stabilnost fiskalnog sistema i obezbijedio osnov za razvojne inicijative, zaduživanje treba biti na realnim i održivim osnovama. Prema raspoloživim podacima, ukupan dug Federacije, kantona, gradova, općina i javnih preduzeća u Federaciji BiH (u daljem tekstu: ukupan dug u Federaciji BiH) na dan 31.12.2018. godine iznosi 5.651,96 mil. KM, što predstavlja nastavak trenda smanjena duga u Federaciji (na kraju 2017. godine bio je manji za 652,31 mil. KM, a na kraju 2018. godine za 219,69 mil. KM u odnosu na prethodnu godinu).

3. Srednjoročna makroekonomska prognoza i fiskalna strategija Bosne i Hercegovine, Federacije BiH i Srednjobosanskog Kantona (SBK)

3.1 Makroekonomske projekcije BiH za period 2018. - 2022. godine

Tabela 1.

Indikator	Zvanični podaci	Projekcije				
	2017	2018	2019	2020	2021	2022
Nominalni BDP u mil KM	32.510	34.034	35.507	37.107	39.036	41.098
Nominalni rast u %	4,8	4,7	4,3	4,5	5,2	5,3
BDP deflator (prethodna godina = 100)	101,3	100,4	101,2	100,8	101,3	101,3
Realni BDP u mil KM (prethodna godina = 100)	32.092	33.578	35.090	36.804	38.535	40.581
Realni rast u %	3,4	3,3	3,1	3,7	3,8	4,0
Inflacija mjerena indeksom potrošačkih cijena u %	1,3	1,4	1,3	1,4	1,5	1,7
Potrošnja u mil KM	31.036	31.921	32.809	33.782	34.827	36.076
Realni rast u %	1,6	1,5	1,3	1,6	1,7	1,8
Vladina potrošnja u mil KM	6.369	6.497	6.614	6.753	6.874	7.080
Realni rast u %	1,5	0,8	0,3	0,6	0,3	0,5
Privatna potrošnja u mil KM	24.667	25.425	26.195	27.030	27.953	28.996
Realni rast u %	1,6	1,7	1,6	1,8	2,0	2,1
Investicije (bruto) u stalna sredstva u mil KM	5.653	6.251	6.715	7.378	8.108	8.952
Realni rast u %	5,8	10,3	7	9,3	9,7	8,8
Vladine investicije u mil KM	728	932	1.035	1.283	1.501	1.711
Realni rast u %	1,4	26,5	9,4	22,2	15,3	11,2
Privatne investicije u mil KM	4.924	5.318	5.680	6.095	6.607	7.241
Realni rast u %	6,4	7,9	6,6	7,0	8,5	8,3
Uvoz u mil KM	17.701	19.091	20.036	21.491	23.055	24.931
Nominalni rast u %	13,3	7,9	5,0	7,3	7,3	8,1
Realni rast u %	7,9	6,3	2,9	4,7	5,1	4,6
Izvoz u mil KM	12.575	13.976	14.955	16.362	17.941	19.712
Nominalni rast u %	18,4	11,1	7,0	9,4	9,6	9,9
Realni rast u %	12,2	8,9	4,9	7,2	6,7	6,6
Nacionalna bruto štednja u % BDP-a	15,8	16,9	17,8	18,7	20,0	20,9
Bilans tekućeg računa u mil KM	-1.473	-1.488	-1.451	-1.498	-1.512	-1.657
Rast u %	5,1	1,0	-2,5	3,2	1,0	9,6
Bilans tekućeg računa u % BDP-a	-4,5	-4,4	-4,1	-4,0	-3,9	-4,0

Izvor: Direkcija za ekonomsko planiranje (DEP), mart 2019. godine

Prema podacima i projekcijama Direkcije za ekonomsko planiranje (DEP) i Federalnog ministarstva finansija, koji su navedeni u tabeli 1., može se vidjeti da se između 2017. i 2018. godine u BiH desio pad realnog BDP-a od 0,1 % (sa 3,4 % na 3,3 %), dok se u narednim godinama očekuje rast od 3,1 % u 2019. godini do 4,0 % u 2022. godini.

Očekivani ekonomski rast nekih od važnijih ekonomskih partnera iz bližeg okruženja, ali i usporen ekonomski rast EU bi trebali poticati BiH prema dodatnim ekonomskim mjerama za razvoj u periodu 2020.-2022. godine. Ekonomski rast u okruženju bi mogao poboljšati trendove kako tekućih tako i kapitalnih novčanih priliva iz inostranstva ali usporen ekonomski rast EU je zabrinjavajući i zbog toga je potrebno da BiH na svim nivoima vlasti uspostavi makroekonomsku stabilnost ponajviše kontrolom nad javnom potrošnjom i investicijama.

Makroekonomska kretanja u srednjoročnom periodu imaju uglavnom pozitivan trend, te fokus izvoznih i ekonomskih mjera BiH treba svakako usmjeriti na rast BDP-a zemalja iz okruženja i regije, iako je u istim tim zemljama u prethodnim periodu vladala makroekonomska nestabilnost. Nakon pozitivnih makroekonomskih dešavanja koja su dovela do povoljnijeg vanjskog okruženja, prestanka pada investicija, te postepenog rasta zaposlenosti nakon višegodišnjeg realnog rasta izvoza od preko 5 % u prosjeku, očekuje se da bi ekonomski rast (GDP) u 2018. godini trebao biti nešto brži u odnosu na 2017. godinu sa realnom stopom od 3,3 %. Nakon toga se očekuje za period 2020-2022 dodatno ubrzanje stope ekonomskog rasta.

Projekcije za period 2020.–2022. godina podrazumijevaju nastavak postepenog poboljšanja u okruženju koje bi trebalo dodatno ojačati rast investicija. Tokom 2019. očekuje se nastavak oporavka BiH privrede. Očekuje se da bi BiH tokom 2019. i 2020. godine trebala u velikoj mjeri provesti strukturalne reforme. Rast izvozne potražnje bi trebao potaći, u velikoj mjeri izvozno orijentiranu industrijsku proizvodnju koja bi u 2019. trebala ostvariti rast od približno 4,9 %. Energetski sektor (rudnici, proizvodnja električne energije i proizvodnja koksa i derivata nafte) bi u 2019. i 2020. godini trebao ostvariti povećanje ukupne proizvodnje.

Dosljedna i pravovremena implementacija „Reformske Agende“ trebala bi omogućiti poboljšanje poslovanja BiH kompanija što bi trebalo rezultirati povećanjem investicija i obima proizvodnje u okviru prerađivačke industrije. Pored prerađivačke industrije, tokom 2019. godine očekuje se i značajniji doprinos energetskog sektora koji čini 1/3 ukupne industrijske proizvodnje u BiH.

U 2019. godini se, uslijed slabljenja izvozne potražnje, odnosno smanjene ekonomske aktivnosti u okruženju, očekuje usporavanje izvoznog i uvoznog rasta, s tim da će ovakvo usporavanje biti izraženije na uvoznjoj strani, što će u konačnici rezultirati blagim smanjenjem vanjskotrgovinskog deficita, odnosno pozitivnim doprinosom ekonomskom rastu. Veća iskorištenost kapaciteta u EU bi kroz rast izvozne potražnje trebala rezultirati daljnjim povećanjem BiH prerađivačke industrije i njenom postupnom vraćanju na nivo pretkriznog razdoblja. Nastavak investicionih ulaganja u infrastrukturu i energetiku bi također trebao značajno doprinijeti jačanju kako građevinskog sektora u BiH tako i onih grana prerađivačke industrije koje su usko vezane uz građevinarstvo. Tako se prema projekcijama Direkcije za ekonomsko planiranje (DEP-a) za 2019. godinu u BiH očekuje realno povećanje ukupnog BiH izvoza od 4,9 %. Ovo bi rezultiralo umjerenim smanjenjem vanjskotrgovinskog deficita a ukupna pokrivenost uvoza izvozom bi bila poboljšana i na kraju 2019. godine iznosila bi oko 70 %.

Na tržištu rada u BiH se u narednom srednjoročnom periodu očekuje daljnje smanjenje stope nezaposlenosti, odnosno porast broja zaposlenih lica. Projekcije su određene poslovnim ambijentom u BiH, odnosno u regiji, uz pretpostavku povećanog obima poslovnih aktivnosti. Uz ovakve uslove, u BiH se očekuje i rast prosječne neto plate koja bi se u periodu od 2020 – 2022. godine mogla uvećati za 3,2%- 3,4%. Promjene na tržištu rada su determinisane poslovnim okruženjem u BiH i regionu, odnosno obimom investicija i vanjske trgovine.

Obzirom na očekivanja nižih cijena sirove nafte, pretpostavljena inflacija u EU u 2019. godini bi mogla biti nešto niža u odnosu na 2018. godinu i iznositi 1,6%. U BiH se, na osnovu posljednjih raspoloživih podataka u 2019. godini može očekivati inflacija od 1,3%, dok se u periodu 2020- 2022. godina očekuje kretanje iste po stopama 1,4%-1,7%. Kretanje inflacije će, kao i u prethodnom periodu, prvenstveno biti određeno kretanjem cijena sirove nafte na svjetskom tržištu, cijena hrane i alkoholnih/bezalkoholnih pića, cijena komunalija u manjem obimu, te periodom provedbe akcizne politike na cigarete.

3.2. Makroekonomske projekcije FBiH za period 2019. - 2022. g.

Posljednji statistički pokazatelji o makroekonomskim kretanjima u Federaciji BiH ukazuju na nastavak trenda ekonomskog rasta u 2019. godini. Projekcije nominalnog i realnog BDP-a FBiH, sa pripadajućim stopama rasta prikazane su u Tabeli 2.

U periodu od 2019-2022. godine u Federaciji BiH se očekuje rast BDP-a po stopama od 3,7%, 3,8%, 4,0% i 4,2%, respektivno. Uprkos projiciranom usporenom rastu u Evropskoj uniji (projicirani rast za EU je revidiran sa 1,9% na 1,5%), u FBiH se u 2019. godini očekuje nastavak ekonomskog rasta u odnosu na prethodni period, u iznosu od 3,7%. Očekivani rast će najznačajnije uporište imati u očekivanom porastu privatne i javne potrošnje, uslijed višegodišnje provedbe politike fiskalne konsolidacije, te porastu ukupnih (privatnih i javnih) investicija.

Tabela 2. Projekcije BDP-a za Federaciju BiH za period 2019 – 2022. god.

Indikator	Izvršenje		Projekcije FMF-a			
	2017.	2018.	2019.	2020.	2021.	2022.
Nominalni BDP u mil.KM	20.540	21.765	22.744	23.790	24.979	26.279
Nominalni rast u %	5,1 %	6,0 %	4,5 %	4,6 %	5,0 %	5,2 %
Realni BDP u mil.KM	20.173	21.264	22.561	23.599	24.731	26.017
Realni rast u %	3,2 %	3,5 %	3,7 %	3,8 %	4,0 %	4,2 %

Izvor: Prema podacima Ministarstva finansija FBiH, Smjernice ekonomske i fiskalne politike FBiH za period 2020-2022. godine (Sarajevo maj 2019. godine)

U 2019 godini očekuje se nastavak postepenog poboljšanja eksternog okruženja i povećanje ekonomskog rasta u Federaciji BiH. Očekivano povećanje ekonomskog rasta i zaposlenosti u okruženju bi trebalo osigurati značajan rast ne samo izvoza nego i domaće potražnje koja se u značajnoj mjeri finansira inostranim priljevima. Industrijski promet u FBiH u januaru 2019. godine bio je manji za 5,0% u odnosu na isti mjesec prethodne godine, dok je u februaru 2019. zabilježio rast po stopi od 9,5%. Federacija BiH je za februar 2019. ostvarila izvoz u ukupnoj vrijednosti 610,7 hilj. KM, što je 7,5% više u

odnosu na januar 2019., odnosno za 1,9% više u odnosu na februar prethodne 2018 godine. U istom mjesecu ostvaren je uvoz u vrijednosti 1,01 mlrd. KM, što je za 16,4% više u odnosu na januar 2019., odnosno za 14,1% više u odnosu na februar prethodne godine. U periodu januar-februar 2019. izvoz je prosječno rastao svaki mjesec za 7,5%, a uvoz je prosječno rastao za 16,4%. Procenat pokrivenosti uvoza izvozom je 55,6% što je za 4,6% manje u odnosu na januar 2019. godine, kada je pokrivenost iznosila 60,2%. Trgovinski deficit Federacije BiH za februar 2019. iznosi 487,8 hilj. KM. Najveća vrijednost izvoza i uvoza ostvarena je u području prerađivačke industrije. Potrošačke cijene u februaru 2019. godine, u odnosu na isti mjesec prethodne godine, više su za 1.0% (godišnja inflacija). U januaru 2019.godine u odnosu na januar 2018. godine, cijene su više za 1.6%. U februaru 2019. godine, ukupan broj zaposlenih u Federaciji BiH iznosio je 523.658. U odnosu na prethodni mjesec broj zaposlenih se smanjio za 0,7%, a broj zaposlenih žena za 1,0%. Broj nezaposlenih u februaru 2019. godine u odnosu na prethodni mjesec se smanjio za 0,7%, a broj nezaposlenih žena za 0,6%. Stopa registrirane nezaposlenosti u februaru 2019. iznosila je 38,4%, a za žene 46,1%. Prosječna mjesečna isplaćena neto plaća po zaposlenom za februar 2019. godine u Federaciji BiH iznosi 895,0 KM i nominalno je niža za 3,1%, a realno za 3,4%, u odnosu na prethodni mjesec. U odnosu na isti mjesec prethodne godine prosječna mjesečna isplaćena neto plaća po zaposlenom za februar 2019. godine nominalno je viša za 5,0%, a realno za 4,0%. Prosječna mjesečna isplaćena bruto plaća po zaposlenom za februar 2019. godine u Federaciji BiH iznosi 1.372,0 KM i nominalno je niža za 3,5% i realno za 3,7%, u odnosu na prethodni mjesec. U odnosu na isti mjesec prethodne godine prosječna mjesečna isplaćena bruto plaća po zaposlenom za februar 2019. godine nominalno je viša za 5,1%, a realno za 4,0%. *(Izvor: Ministarstvo finansija FBiH, Smjernice ekonomske i fiskalne politike FBiH za period 2020-2022. godine, Sarajevo maj 2019. godine).*

Uz navedeno, nastavak provedbe politike fiskalne konsolidacije ima za cilj smanjenje javne potrošnje u odnosu na BDP, kroz ograničavanje rasta tekuće potrošnje i tekućih transfera, uvažavajući zakonski predviđen rast istih, te bi se eventualno ostvarene uštede, odnosno fiskalni prostor usmjerio na kapitalne investicije, čijim bi se rastom u konačnici ostvario i veći sveukupni ekonomski rast. Dakle, u narednom srednjoročnom periodu se u Federaciji BiH očekuje značajniji doprinos javnih investicija rastu BDP-a, prvenstveno kroz planiranu izgradnju putne i energetske infrastrukture.

Strategija reforme upravljanja javnim finansijama u Federaciji BiH predstavlja efikasno oruđe za efikasnu i efektivnu raspodjelu javnih resursa uz povećanje transparentnosti i ukupne funkcionalnosti upravljanja javnim finansijama u Federaciji BiH. S ciljem uspostavljanja kvalitetnijeg sistema upravljanja javnim finansijama, Vlada Federacije BiH i u narednom fiskalnom periodu planira nastavak provedbe strukturnih reformi, uz doprinos svih budžetskih korisnika definisanih u Strategiji upravljanja javnim finansijama, kako bi se ostvarili postavljeni ciljevi i postigli željeni efekti. Prema konzervativnim procjenama, prihodi FBiH bi u 2019. godini trebali ostvariti skroman rast od 1,8 % dok se za 2020. i 2021. godinu procjenjuje rast prihoda od 2,5% i 3,0 %. Projekcije javnih rashoda Budžeta Vlade Federacije BiH za 2019. godinu iznose 1.635,1 mil KM i čine 8,1% BDP-a Federacije BiH, što predstavlja pad od 1,6% u odnosu na planirane rashode u 2018. godini. Javni rashodi projicirani su na nivou od 1.628,0 mil. KM (7,4% BDP-a Federaciji BiH) u 2020. godini, i 1.627,2 mil. KM (7,2% BDP-a Federacije BiH) u 2021. godini. *(Izvor: Dokument okvirnog budžeta FBiH za period 2019-2021. Sarajevo, juni 2018.)*

3.3. Makroekonomske projekcije za SBK za period 2019-2022.

Srednjobosanski kanton (SBK) zauzima 3.189 km² površine i čine ga dvanaest općina: **Bugojno**, Busovača, Dobretići, Donji Vakuf, Fojnica, Gornji Vakuf-Uskoplje, Jajce, Kiseljak, Kreševo, Novi Travnik, Travnik i Vitez, što čini 12,21 % ukupne teritorije Federacije BiH, odnosno 6,23 % ukupne teritorije Bosne i Hercegovine. Procjene Federalnog zavoda za statistiku pokazuju da u ovom kantonu ima oko 251.000 stanovnika, što je oko 11 % u odnosu na ukupan broj stanovnika Federacije Bosne i Hercegovine. Gustoća naseljenosti je nešto ispod prosjeka Federacije BiH (79,0 u SBK naspram 84,5 stanovnika po km² u FBiH). *(Izvor: Dokument okvirnog budžeta SBK za razdoblje 2019-2021, juli 2018. godine).*

Evropska unija kao preduvjet za aplikaciju BiH u članstvo EU traži usvajanje **Reformske agende između svih nivoa vlasti u BiH**, koja uključuje njenu provedbu kroz niz reformi. Taj dokument precizira provođenje mjera i aktivnosti koje će poboljšati poslovno okruženje i smanjiti opterećenja na rad, poboljšavanje efikasnost javne uprave, jačanje kapaciteta tržišta rada, unapređenje fiskalne održivosti i finansijsku stabilnost. **Provedba**

Reformske agende je prioritet. Širok set srednjoročnih prioriteta bit će prerađen u konkretne inicijalne mjere i pothvate, koji će biti pripremljeni i trebali bi biti provedeni u 2019. godini, sa svakom institucijom pojedinačno. Ove mjere i pothvati će biti razrađeni do daljnjih preciznijih mjera koje će Reformsku agendu pomjeriti s njene početne faze dalje u srednjoročno razdoblje. Provedba ovog dokumenta značajno će utjecati na ekonomsku i fiskalnu politiku u SBK i njenim općinama. Prema statističkim podacima (**tabela 3**) ukupan broj poslovnih subjekata u FBiH na dan 31.12.2017. godine je iznosio 105.961, što je više za 0,8 % u odnosu na prethodnu godinu. Ukupan broj poslovnih subjekata za 2017 godinu u SBK iznosi 9.911 i manji je za 314 ili 8,6% u odnosu na prethodnu godinu. Broj poslovnih subjekata u SBK učestvuje u ukupnom broju poslovnih subjekata u Federaciji BiH sa 9,4%. Broj registriranih preduzeća u 2017 godini u Općini Bugojno je iznosio 1.664 *odnosno 53 preduzeća na 1000 stanovnika što je iznad prosjeka u FBiH.* (Izvor: Federalni zavod za programiranje razvoja : Makroekonomski pokazatelji po kantonima FBiH, juni 2018. godine.

Tabela 3. Stanovništvo i Struktura poslovnih subjekata u SBK po općinama za 2017. god.

Općine	Stanovništvo	Broj preduzeća				Broj preduzeća na 1000 stanovnika
		Ukupno (Pravne osobe + obrti)	Pravne osobe	Jedinice u sistemu pravnih osoba	Obrti	
UKUPNO SBK	251.434	9.911	4.939	2.636	4.972	39,4
Bugojno	31.173	1.664	674	385	990	53,4
Busovača	17.773	681	299	135	382	38,3
Dobretići	1.584	29	27	13	2	18,3
Donji Vakuf	13.817	511	224	146	287	37,0
Fojnica	11.900	474	206	102	268	39,8
G. Vakuf-	20.409	674	269	149	405	33,0
Jajce	26.761	756	407	220	349	28,3
Kiseljak	20.431	1.004	548	247	456	49,1
Kreševo	5.094	291	184	56	107	57,1
Novi Travnik	23.752	720	411	248	309	30,3
Travnik	52.875	1.881	999	619	882	35,6
Vitez	25.865	1.226	691	316	535	47,4
FBiH	2.201.193	105.961	57.143	29.378	48.818	48,1

Izvor: Federalni zavod za programiranje, Socioekonomski pokazatelji po općinama u FBiH, juni 2018.

Napominjemo da SBK nekoliko godina unazad zauzima 7. mjesto od 10 kantona u Federaciji BiH po indeksu razvijenosti. Nakon pada vrijednosti indeksa razvijenosti u 2015. u odnosu na 2014. godinu, zabilježeno je značajno povećanje u 2016. godini na vrijednost od 83,7, dok je u 2017. godini vrijednost indeksa zabilježila blagi pad na 83,4.

Industrijska proizvodnja SBK i Općine Bugojno

U 2017. godini u Federaciji BiH ostvaren je izvoz u ukupnom iznosu od 7.255 mil. KM što je za 15,9% više u odnosu na izvoz u 2016. godini. U SBK izvoz je u 2017. iznosio 715 mil. KM što je za 1,8% više u odnosu na prethodnu godinu. Izvoz SBK-a učestvuje u ukupnom izvozu FBiH sa 10,8%. Povećanje izvoza zabilježeno je u većini općina SBK, a najviše u Kreševu za 46,2%, Kiseljaku za 40,0% dok je najveće smanjenje izvoza zabilježeno u općini Travnik za 20,7%. U 2017. godini u Federaciji BiH ostvaren je uvoz u ukupnom iznosu od 12.435 mil. KM što je za 13,8% više u odnosu na 2016. godinu. U SBK uvoz je u 2017. iznosio 975 mil. KM što je za 4,6% više u odnosu na prethodnu godinu. Uvoz SBK-a učestvuje u ukupnom uvozu FBiH sa 7,8%. Povećanje uvoza zabilježeno je u nekoliko općina SBK, a najviše u općini Novi Travnik za 34,7% i Jajce za 26,8%. Trgovinski deficit Federacije BiH u 2017. godini ostvaren je u iznosu od 5.181 mil. KM i bilježi povećanje za 11,0 % u odnosu na 2016. godinu, dok je u Srednjobosanskom kantonu zabilježen deficit u iznosu od 260 mil. KM i bilježi rast za 13,1 % u odnosu na prethodnu godinu. **Općina Bugojno je u 2017. godini ostvarila ukupni izvoz od 63 mil.KM i uvoz u iznosu od 33 mil.KM što čini 190 % pokrivenosti uvoza izvozom.** (Izvor: Federalni zavod za programiranje razvoja, Socioekonomski pokazatelji po općinama FBiH u 2017., Sarajevo, 2018.)

Tržište rada SBK i Općine Bugojno

U skladu sa prisutnim trendovima u cijeloj BiH i na području SBK vidljiv je pad broja stanovnika, uzrokovan kako smanjenim natalitetom tako i odlaskom stanovništva sa područja SBK. Na navedenu problematiku ukazuje i kontinuirano smanjenje broja učenika na 1.000/stanovnika. Ohrabruje činjenica, da je u periodu 2013.-2017. godine u SBK zabilježeno konstantno povećanje broja zaposlenih, te je taj pokazatelj u 2017. godini dostigao broj od 46.518 zaposlenih osoba, što je za 3.044 više nego u 2016. godini. Navedeno je od 2014. godine praćeno i konstantnim smanjenjem broja nezaposlenih. Iako je i dalje visoka, stopa registrovane nezaposlenosti u SBK, u 2017.

godini iznosila je 45,2% i manja je za oko 2% u odnosu na 2016. godini. Najviše zaposlenih u SBK u 2017. godini evidentirano je u općini Travnik (13.880), a zatim slijede Vitez (6.263) i Bugojno (4.904). Najmanje zaposlenih ima općina Dobretići sa 34 registrovanih zaposlenih osoba. Povećanje broja zaposlenih je od 2014. godine praćeno je i konstantnim smanjenjem broja nezaposlenih. Na području SBK je na kraju 2017. godine evidentirano 36.799 nezaposlenih lica, dok je na kraju 2016. godine ovaj broj iznosio 38.748 nezaposlene osobe, što je za 1.949 osoba manje u odnosu na broj evidentiranih krajem 2016. godine.

U 2017. godini u FBiH prosječna mjesečna isplaćena neto plaća je iznosila 860 KM i viša je za 2,5% u odnosu na prethodnu godinu. U SBK prosječna neto plaća u 2017. godini je iznosila 698 KM što je više za 2,9% u odnosu na 2016. godinu i što je 81,1% u odnosu na prosjek FBiH. Najviša prosječna neto plata je tokom 2017. godine u SBK evidentirana u Dobretićima (1.056 KM), a najniža u Bugojnu (631 KM). *(Izvor: Ured SBK za evropske integracije, fondove, odnose s javnošću i kvalitet prema međunarodnom standardu: Godišnji izvještaj o razvoju sa pregledom provedbe Strategije razvoja SBK, septembar 2018.)*

Po novim podacima od Zavoda za zapošljavanje SBK, krajem mjeseca januara 2019. godine na evidenciji Službe za zapošljavanje Srednjobosanskog kantona bilo je evidentirano ukupno 34.826 osoba, što je u poređenju sa stanjem kraja mjeseca decembra 2018. godine povećanje za 47 osoba ili 0,13%. Broj nezaposlenih lica u općini Bugojno sa 31.12.2018.godine je iznosio 5.231. Prema tome, po novim podacima u Općini Bugojno bilježimo pad broja lica koja traže posao za 209 u odnosu na 31.12. 2017 godinu *(Izvor: Bilten Zavoda za zapošljavanje SBK, januar 2019.).*

Projekcije prihoda SBK

Ukupni prihodi u budžetu SBK za 2018. godinu su ostvareni u iznosu od 264.747.353 KM. Procjenjene stope rasta prihoda za SBK za 2019. iznose 4,2 % u odnosu na ostvareno u 2018. godini, dok je za 2020. godinu projiciran rast prihoda za 8 % u odnosu na ostvareno u 2018. godini. Projekcija prihoda u navedenom razdoblju zasnovana je na projiciranim relevantnim makroekonomskim pokazateljima, historijskoj sezonskoj shemi naplate i projekcijama pojedinih kategorija prihoda za 2019. i 2020. godinu, te efektima izmjena politika u oblasti carina i trošarina na duhan.

Porezni prihodi u budžetu SBK su ostvareni u iznosu do 223 mil. KM u 2018. godinu a procjenjuju se u iznosu od 233 mil. KM za 2019. godinu i 242 mil. KM za 2020. godinu. **Neporezni prihodi** su ostvareni u iznosu od 42 mil. KM za 2018. godinu a procjenjuju se u iznosu od 43 mil. KM za 2019. godinu i 44 mil. KM za 2020. godinu. *(Izvor: Projekcije preuzete od Ministarstva finansija SBK koje je preuzelo podatke od Odjeljenja za makroekonomsku analizu Upravnog odbora za indirektno oporezivanje, maj 2019.)*

Najveći generator suficita prihoda od neizravnih poreza u navedenom razdoblju je PDV, s obzirom na njegovo značajno udio u prihodima, te planiranim stabilnim stopama rasta u skladu s projiciranim stopama rasta potrošnje. U sve tri navedene godine prihodi od PDV-a generiraju preko 65 % apsolutnog godišnjeg projiciranog rasta prihoda. Odjeljenje za makroekonomsku analizu Upravnog odbora za indirektno oporezivanje očekuje da će zbog pojačane supstitucije cigareta rezanim duhanom i osnaženja crnog tržišta, vrijednost tržišta duhanskih prerađevina rasti usporeno, a pad potrošnje cigareta bit će sve izraženiji.

Porezni prihodi se dijele na

a) Prihode od indirektnih poreza

- Prihodi od indirektnih poreza iz raspodjele sa jedinstvenog računa (Kanton, Općine upravitelji cesta),
- Prihodi od namjenske putarine za finansiranje autocesta i cesta

b) Prihode od direktnih poreza

- Porez na dobit
- Porez na dohodak
- Porez građana
- Ostali porezi

Izdvajamo slijedeće prihode SBK:

Prihodi od indirektnih poreza iz raspodjele sa jedinstvenog računa

Prihodi od indirektnih poreza s Jedinstvenog računa su Zakonom o pripadnost javnih prihoda u Federaciji BiH (Službene novine Federacije BiH broj: 22/06, 43/08, 22/09, 35/14 i 94/15) detaljno regulisani raspodjelom prihoda od indirektnih poreza između Federacije, kantona, jedinica lokalne samouprave i direkcija za ceste.

Ukupni prihodi od indirektnih poreza su ostvareni u iznosu od 167 mil. KM u 2018. godini a procjenjeni su u iznosu od 174 mil KM za 2019. godinu i projicirani su da rastu do iznosa od 197.4 mil KM u 2022. godini.

Raspodjela prihoda od indirektnih poreza s jedinstvenog računa za kanton i općine procjenjuje se u iznosu od 166 milijuna KM u 2019., što predstavlja **rast od 3,8 %** u odnosu na 2018. godinu po revidiranim projekcijama Sektora za poreznu politiku i javne prihode Federalnog ministarstva financija, i 172 milijuna KM u 2020. godini što predstavlja **rast od 7,5 %** u odnosu na 2018. godinu. U dvije naredne fiskalne godine ovi iznosi su projicirani na 178 milijuna KM u 2021. godini, te 188 milijuna KM u 2022. godini.

U tabeli 4. je prikaz Izvršenja prihoda od indirektnih poreza Kantona, općine/gradove SBK i općinu Bugojno sa Jedinstvenog računa za 2018. godinu, planirano za 2019. g. i projekcije za period 2020. - 2022. godina.

Tabela 4.

Indirektni porezi	Izvršenje 2018	2019	2020	2021	2022
Ukupno	159.581.623	165.933.417	172.416.596	178.439.387	188.347.879
Kanton	133.918.288	139.032.067	144.464.185	149.510.553	157.812.667
(Bugojno)	(3.243.802)	(3.422.774)	(3.556.506)	(3.680.740)	(3.885.127)
Općine/gradovi	25.663.335	26.901.349	27.952.411	28.928.834	30.535.212

Izvor: Projekcije su urađene na bazi ukupnog plana prihoda na Jedinstvenom računu, preuzetog od strane Odjeljenja za makroekonomsku analizu Upravnog odbora Uprave za indirektno oporezivanje (OMA), april 2019 godine.

Prihodi od direktnih poreza

Projekcija prihoda od direktnih (izravnih) poreza urađene su po ustaljenoj metodologiji, prateći makroekonomske pokazatelje (GDP-nominalni i realni rast GDP-a, inflacija, potrošnja, investicije), uz praćenje godišnjih i sezonskih trendova ostvarenja prihoda u prethodnim godinama i izmjena propisa koji tretiraju određene oblasti. Efekti naplate prihoda od poreza na dobit od uvođenja Zakona o porezu na dobit, pokazuju blagi rast za kantonalne Budžete, a koji se različito odražavaju za svaki kanton pojedinačno.

Kantoni u skladu sa Zakonom o pripadnosti javnih prihoda u Federaciji BiH prikupljaju niz drugih direktnih poreza, koji uključuju porez na dobit pravnih lica i porez na dohodak, zatim prihode po osnovu kantonalnih propisa o porezima na imovinu i niz neporeznih prihoda, koji im omogućavaju da financiraju ustavom utvrđene funkcije.

Ukupni prihodi od direktnih poreza za SBK ostvareni su u iznosu od 56 mil. KM u 2018. godinu a projicirani su u iznosu od 59 mil. KM za 2019. godinu, 61 mil. KM za 2020. godinu, 63.5 mil. KM za 2021. godinu i 66.3 mil. KM za 2022. godinu. Izdvajamo dva značajnija poreza po ovom osnovu: Porez na dobit i porez na dohodak.

- **Porez na dobit** u SBK je ostvaren u iznosu od 22 mil. KM u 2018. godini a projiciran je u iznosu od 24 mil. KM za 2019., 24.9 mil KM za 2020, 25.8 mil. KM za 2021. i 26.8 mil. KM za 2022. godinu.

- U 2019. godini projiciran je iznos prihoda za kanton po osnovu **poreza na dohodak** od 18,5 milijuna KM., što predstavlja **daljnje povećanje** od **14%** u odnosu na ostvareno u 2018. godini (16,3 milijuna KM). Porast ovih prihoda za kanton projiciran je i za period 2020-2022 godinama, dok je za Općine/gradove u SBK pojedinačno projicirano smanjenje prihoda od poreza na dohodak u 2019. godini za 10 %, u 2020. za 7,4 % , 2021. za 2,7 % dok je projicirano povećanje za Općine/gradove u 2022. za 1,9 % u odnosu na ostvareno u 2018. godini.

4. Projekcije Budžeta Općine Bugojno za period 2020-2022

4.1 Projekcije prihoda za period 2020-2022 godinu

Očekivani nivo ukupnih (poreznih i neporeznih) prihoda, koji su na raspolaganju za finansiranje funkcija Budžeta općine Bugojno, iznosi 7.687.000 KM u 2019. godini i trenutno se ostvaruju u skladu sa planiranim dok su projekcije za razdoblje 2020-2022. godinu slijedeće:

- 7.720.000 KM u 2020. godini,
- 7.928.000 KM u 2021. godini,
- 8.232.000 KM u 2022. godini. **(Tabela 5)**

Projekcija ukupnih prihoda za 2020. godinu predviđa veći iznos u odnosu na ostvareno u 2018. godini iako neporezni prihodi Općine i transferi sa viših nivoa vlasti nisu ostvareni u mjeri koja se očekivala u 2018. godini, dok se ista vrsta prihoda u tekućoj 2019. godini ostvaruju u skladu sa planiranim i za očekivati je da će se isti trend povećanja nastaviti i naredne fiskalne godine.

Tabela 5. Projekcija prihoda, primitaka i finansiranja za općinu Bugojno 2020 - 2022

R. b.	Ekon. kod	Opis	Ostvareno	Ostvareno	Plan	Projekcije		
			2017.	2018.	2019.	2020.	2021.	2022.
1		PRIHODI, PRIMICI I FINANSIRANJE	7.104.434,00	6.999.585,00	7.687.000,00	7.720.000,00	7.928.000,00	8.232.000,00
2	710000	PRIHODI OD POREZA	5.288.129,00	5.625.434,00	5.569.000,00	5.719.000,00	5.847.000,00	6.071.000,00
3	711000	Porezi na dobit pojedinaca i poduzeća	6.377,00	795,00	3.000,00	5.000,00	5.000,00	7.000,00
4	712000	Doprinosi za socijalnu zaštitu	0,00	0,00	0,00	0,00	0,00	0,00
5	713000	Porezi na plaću i radnu snagu	363,00	508,00	1.000,00	1.000,00	1.000,00	1.000,00
6	714000	Porez na imovinu	920.378,00	718.624,00	830.500,00	800.000,00	870.000,00	950.000,00
7	715000	Domaći porezi na dobra i usluge (zaostale obveze na temelju poreza na promet dobara i usluga)	12.180,00	896,00	1.000,00	10.000,00	8.000,00	10.000,00
8	716000	Porez na dohodak	1.114.266,00	1.266.834,00	1.200.000,00	1.220.000,00	1.240.000,00	1.300.000,00
9	717000	Prihodi od neizravnih poreza	3.234.103,00	3.635.289,00	3.530.000,00	3.680.000,00	3.720.000,00	3.800.000,00
10	719000	Ostali porezi	462,00	2.488,00	3.500,00	3.000,00	3.000,00	3.000,00
11	720000	NEPOREZNI PRIHODI	1.584.563,00	1.239.793,00	1.868.000,00	1.761.000,00	1.811.000,00	1.881.000,00
12	721000	Prihodi od poduzetničkih aktivnosti i imovine i prihodi od pozitivnih tečajnih razlika	127.177,00	36.754,00	57.000,00	60.000,00	60.000,00	80.000,00
13	722000	Naknade i pristojbe i prihodi od pružanja javnih usluga	1.456.407,00	1.202.439,00	1.810.000,00	1.700.000,00	1.750.000,00	1.800.000,00
14	723000	Novčane kazne (neporezne prirode)	979,00	600,00	1.000,00	1.000,00	1.000,00	1.000,00
15	730000	TEKUĆI TRANSFERI (TRANSFERI I DONACIJE)	3.115,00	48.670,00	150.000,00	120.000,00	150.000,00	150.000,00
16	731000	Primljeni tekući transferi od inozemnih vlada i međunarodnih organizacija	0,00	0,00	0,00	0,00	0,00	0,00
17	732000	Primljeni tekući transferi od ostalih razina vlasti	3.115,00	48.670,00	150.000,00	120.000,00	150.000,00	150.000,00
18	733000	Donacije	0,00	0,00	0,00	0,00	0,00	0,00
19	740000	KAPITALNI TRANSFERI	202.797,00	83.068,00	100.000,00	100.000,00	100.000,00	100.000,00
20	741000	Primljeni kapitalni transferi od inozemnih vlada i međunarodnih organizacija	0,00	0,00	0,00	0,00	0,00	0,00
21	742000	Kapitalni transferi od ostalih razina vlasti	202.797,00	83.068,00	100.000,00	100.000,00	100.000,00	100.000,00
22	770000	PRIHODI PO OSNOVI ZAOSTALIH OBVEZA	0,00	0,00	0,00	0,00	0,00	0,00
23	777000	Prihodi po osnovi zaostalih obveza	0,00	0,00	0,00	0,00	0,00	0,00
24	810000	KAPITALNI PRIMICI	25.830,00	2.620,00	0,00	20.000,00	20.000,00	30.000,00
25	811000	Kapitalni primici od prodaje stalnih sredstava	25.830,00	2.620,00	0,00	20.000,00	20.000,00	30.000,00
26	813000	Primici od financijske imovine	0,00	0,00	0,00	0,00	0,00	
27	814000	Primici od dugoročnog zaduživanja	0,00	0,00	0,00	0,00	0,00	0,00
28	815000	Primici od kratkoročnog zaduživanja	0,00	0,00	0,00	0,00	0,00	0,00

Izvor: Služba za finansije i inspeksijski nadzor Općine Bugojno maj, 2019.

Prihodi od poreza (ekonomski kod 710000)

Uključuju slijedeće poreze:

- Porez na dobit pojedinaca i poduzeća
- Porez na plaću i radnu snagu
- Porez na imovinu
- Domaći porez na dobra i usluge
- Porez na dohodak
- Prihodi od neizravnih (indirektnih) poreza
- Ostali porezi

Očekivani ukupni iznos prikupljenih poreznih prihoda za Općinu Bugojno u 2019. godini iznosi 5.569.000 KM. Dalje, projekcija poreznih prihoda u 2020.godini iznosi 5.719.000 KM, u 2021. godini 5.847.000 KM i u 2022. godini 6.071.000 KM. **(Tabela 5.)**

Iz navedenog može se konstatovati da će rast poreznih prihoda za period 2020-2022 stabilizirati budžet općine odnosno omogućiti Općini da povećanjem iznosa za neraspoređeni višak prihoda nad rashoda sanira akumulirani višak rashoda nad prihodima iz prethodnih godina.

Izdvajamo povećanje slijedećih poreznih prihoda:

Porezi na imovinu (ekonomski kod 714000)

Ovi porezi obuhvataju porez na imovinu od fizičkih i pravnih lica, porez na nasljeđe i darove, porez na promet nepokretnosti fizičkih i pravnih lica i ostale poreze na imovinu koji se naplaćuju i raspoređuju između budžeta kantona i općina prema kantonalnim propisima.

Projekcija ovih prihoda za 2019. godinu je 830.500 KM , za 2020.godina 800.000 KM , za 2021.godina 870.000 KM i za 2022. godinu 950.000 KM.

Prihodi od indirektnih poreza (ekonomski kod 717000)

Prihode od indirektnih poreza čine: porezi na dodanu vrijednost (PDV), porezi koji pripadaju Direkciji cesta i porezi na ime finansiranja autocesta FBiH.

Najznačajniji u ovoj grupi prihoda je prihod od PDV-a, koji se zajedno sa porezima koji pripadaju Direkciji cesta i sa porezima na ime finansiranja autocesta FBiH predviđa u iznosu

od 3.680.000 KM za 2020. godinu što je u skladu sa smjernicama dostavljenim od strane viših nivoa vlasti. U 2021. godini planiran je prihod od indirektnih poreza za Općinu Bugojno u iznosu od 3.720.000 KM i u 2022. godini 3.800.000 KM što je također u skladu sa projekcijama dostavljenim od ministarstva finansija SBK.

Porez na dohodak (ekonomski kod 716000)

Prihodi od poreza na dohodak, u skladu sa smjernicama dostavljenim od SBK, u tekućoj 2019. godini se planiraju u iznosu od 1.200.000 KM, dok se projiciraju u 2020.godini 1.220.000 KM, u 2021. godini 1.240.000 KM i u 2022. godini 1.300.000 KM.

Neporezni prihodi (ekonomski kod 720000)

Neporezni prihodi uključuju:

- naknade i takse (naknade po osnovu dodjele i korištenja građevinskog zemljišta i građenje, administrativne takse, komunalne takse i naknade i ostale općinske naknade)
- novčane kazne
- posebne naknade
- ostale neporezne prihodi (uključujući i vlastite prihode korisnika Budžeta općine)

Očekivani ukupni iznos prikupljenih neporeznih prihoda u 2019. godini iznosi 1.868.000 KM. Dalje, projekcija neporeznih prihoda u 2020.godini iznosi 1.761.000 KM, u 2021. godini 1.811.000 KM i u 2022. godini 1.881.000 KM. **(Tabela 5.)**

Potrebno je napomenuti da su neporezni prihodi još uvijek najslabija tačka sagledavanja prihoda koji se kao takvi različito tretiraju u Federaciji BiH, kantonima i općinama, zbog čega treba uslijediti njihovo specificirano i unificirano praćenje.

Također, uz neporezne prihode potrebno je da se nadležne općinske službe više angažiraju i oko povećanja tekućih transfera sa viših nivoa vlasti koji imaju tendenciju pada zbog nemogućnosti viših nivoa vlasti da sufinansiraju kapitalne projekte lokalnih zajednica tj. Općina.

Napomena: Na osnovu Zakona o pripadnosti javnih prihoda FBiH, potrebno je da Općinsko vijeće do 31.12.2019. donese novu Odluku o komunalnim djelatnostima i naknadama o kojoj značajno zavisi ukupna visina neporeznih prihoda Općine.

4.2. Projekcije rashoda i izdataka po ekonomskoj i funkcionalnoj klasifikaciji za period 2020. - 2022.

Očekivana projekcija rashoda i izdataka Općine Bugojno iznosi 7.720.000 KM u 2020. godini, 7.928.000 KM u 2021. godini i 8.232.000 KM u 2022. godini. Planirani ukupni rashodi i izdaci za 2019. su veći u odnosu na ostvareno u 2018. godini što je u skladu i sa ostvarenim prihodima do 31.05.2019. godini. Zbog nepodmirenih obaveza iz prethodnih godina Općina i dalje nastoji poduzimati mjere štednje kod javne potrošnje koje bi se trebale provoditi kroz ograničavanje rasta tekućih rashoda, uz istovremeno osiguranje normalnog funkcionisanja rada javne uprave kao i osiguravanje sredstava za infrastrukturne projekte i investicije.

Ukupni tekući rashodi (ekonomski kod 610000) su planirani za 2019. godinu u iznosu od 7.317.000 KM a za period 2020-2022. godinu su povećavani u skladu sa projekcijama rasta poreznih i neporeznih prihoda.

Ukupni kapitalni izdaci (ekonomski kod 820000) su planirani za 2019. godinu u iznosu od 336.000 KM a za period 2020-2022. godinu su projicirani na nivou od oko 300.000 KM.

Tekuća rezerva je planirana u iznosu od 34.000 KM za 2019. godinu što je u skladu sa prethodnim fiskalnim godinama a za period 2020-2022. godinu projicira se u iznosu od 35.000 za 2020. godinu do 47.000 KM za 2022. godinu.

U slijedećim **tabelama 6.** su urađene projekcije rashoda i izdataka Općine po ekonomskoj i funkcionalnoj klasifikaciji za period 2020-2022. godine:

Tabele 6. Projekcije rashoda i izdataka Općine po ekonomskoj i funkcionalnoj klasifikaciji za period 2020-2022. godine

R. b.	Ekon. kod	Vrsta rashoda	Ostvareno 2018.	Plan 2019.	Projekcije		
					2020.	2021.	2022.
1		UKUPNO RASHODI I IZDACI	6.895.806,00	7.687.000,00	7.720.000,00	7.928.000,00	8.232.000,00
2	600000	Tekuća rezerva		34.000,00	35.000,00	40.000,00	47.000,00
3	610000	Ukupni tekući rashodi	6.786.210,00	7.317.000,00	7.390.000,00	7.588.000,00	7.885.000,00
4	611000	Plaće i naknade troškova zaposlenih	2.092.688,00	2.435.000,00	2.450.000,00	2.500.000,00	2.600.000,00
5	612000	Doprinosi poslodavaca i ostali doprinosi	194.500,00	225.500,00	230.000,00	240.000,00	260.000,00
6	613000	Izdaci za materijal, sitni inventar i usluge	574.752,00	594.000,00	600.000,00	638.000,00	680.000,00
7	614000	Tekući transferi i drugi tekući rashidi	3.220.745,00	3.372.500,00	3.250.000,00	3.300.000,00	3.380.000,00
8	615000	Kapitalni transferi	688.436,00	675.000,00	850.000,00	900.000,00	950.000,00
9	616000	Izdaci za kamate	15.089,00	15.000,00	10.000,00	10.000,00	15.000,00
10	820000	Ukupni kapitalni izdaci	109.596,00	336.000,00	295.000,00	300.000,00	300.000,00
11	821000	Izdaci za nabavu stalnih sredstava	32.676,00	96.000,00	95.000,00	100.000,00	100.000,00
12	822000	Izdaci za finansijsku imovinu	0,00	200.000,00	200.000,00	200.000,00	200.000,00
13	823000	Izdaci za otplate dugova	76.920,00	40.000,00	0,00	0,00	0,00
14		Broj zaposlenih	86	95	95	95	95

R. b.	Funkc. kod - klasa	RASHODI PO FUNKCIONALNIM KATEGORIJAMA	Ostvareno 2018.	Plan 2019.	Projekcije		
					2020.	2021.	2022.
1		UKUPNO	6.895.806,00	7.687.000,00	7.720.000,00	7.928.000,00	8.232.000,00
2	01	OPĆE JAVNE USLUGE	3.455.471,00	3.992.500,00	3.900.000,00	3.970.000,00	4.087.000,00
3	02	OBRANA	0,00	0,00	0,00	0,00	0,00
4	03	JAVNI RED I SIGURNOST	111.500,00	126.500,00	130.000,00	135.000,00	145.000,00
5	04	EKONOMSKI POSLOVI	500.964,00	555.000,00	625.000,00	640.000,00	700.000,00
6	05	ZAŠTITA ŽIVOTNE SREDINE	100.280,00	139.000,00	140.000,00	150.000,00	160.000,00
7	06	STAMBENI I ZAJEDNIČKI POSLOVI	397.008,00	585.000,00	700.000,00	750.000,00	800.000,00
8	07	ZDRAVSTVO	46.000,00	66.000,00	70.000,00	75.000,00	80.000,00
9	08	REKREACIJA, KULTURA I RELIGIJA	1.411.429,00	1.383.000,00	1.300.000,00	1.325.000,00	1.350.000,00
10	09	OBRAZOVANJE	336.082,00	310.000,00	320.000,00	333.000,00	350.000,00
11	10	SOCIJALNA ZAŠTITA	537.072,00	530.000,00	535.000,00	550.000,00	560.000,00

Izvor: Služba za finansije i inspekcijski nadzor Općine Bugojno maj, 2019.

Plaće i naknade troškova zaposlenih (ekonomski kod 611000)

Planirani prosječni broj zaposlenih (državnih službenika i namještenika) u jedinstvenom organu uprave Općine Bugojno za 2019. godine je 95. Ukupno planirana potrošnja za bruto plaće i naknade zaposlenih u 2019. iznosi 2.435.000 KM dok je projicirani iznos za 2020. godinu 2.450.000 KM, za 2021. godinu iznos bi se trebao povećati na 2.500.000 KM kao i za 2022. godinu na 2.600.000 KM. Projicirani prosječan broj zaposlenih u organu uprave Općine Bugojno za period 2020. - 2022. godinu je 95 uzimajući u obzir odlaske u penziju i zapošljavanje novih državnih službenika i namještenika.

Izdaci za materijal, sitni inventar i usluge (ekonomski kod 613000)

Ukupna izdvajanja za materijalne troškove i usluge Općine Bugojno procjenjuju se na 594.000 KM u 2019. god., 600.000 KM u 2020., 638.000 KM u 2021. godini i 680.000 KM u 2022. godini. Putni troškovi, nabavka materijala, komunalni izdaci, troškovi energije i ugovorene usluge su realno planirani i neizbježni kad je u pitanje pružanje kvalitetne i profesionalne usluge građanima, kao i potreba za sredstvima za rad Općinskog vijeća, Općinskih službi i mjesnih zajednica.

Tekući transferi (ekonomski kod 614000)

Ukupna izdvajanja za tekuće transfere se procjenjuju u iznosu od 3.372.500 KM za 2019., 3.250.000 KM za 2020. godinu, 3.300.000 KM za 2021. godinu i 3.380.000 KM za 2022. godinu. Razlog projiciranih iznosa za ovu namjenu za period 2019-2022 u odnosu na prethodne godine leži u činjenici da opreznije planiranje neporeznih prihoda narednih godina zahtjeva i mjere štednje za sve korisnike budžetskih sredstava dok su bruto plaće zaposlenih zakonski regulisane a materijalni troškovi za rad javne uprave i Općinskog vijeća su minimalno planirani. Uz mjere štednje, budžetsko programiranje je sigurno jedno od rješenja problema nerealne potrošnje korisnika tekućih transfera. Po pitanju izrade programa potrošnje po kojima bi se finansirali svi korisnici budžetskih sredstava, potrebno je da se svi akteri uključe u proces planiranja i izrade dokumenta Budžeta kako bi se sredstva trošila realno, namjenski i transparentno. Kako bi se budžetsko programiranje realizovalo u skladu sa Zakonom o Budžetima FBiH i ostalim zakonskim propisima, potrebno je da sve potrošačke jedinice organa uprave (općinske službe) urade pojedinačne programe utroška sredstava za

tekuće i kapitalne transfere i izdatke kako bi služba za finansije i inspekcijski nadzor mogla pratiti namjenski i transparentan utrošak sredstava iz Budžeta.

Kapitalni transferi (ekonomski kod 615000)

Ukupna izdvajanja za kapitalne transfere se procjenjuju u iznosu od 675.000 KM za 2019. godinu, 850.000 KM za 2020. god., 900.000 KM za 2021. godinu i 950.000 KM za 2022. godinu. Uzimajući u obzir planirano u dokumentu strategije razvoja Općine za period od 2011-2020. godine, zatim potrebe za obnovom infrastrukture na teritoriji Općine i uzimajući u obzir dostavljene ali nepotpune zahtjeve korisnika za finansiranje 2020-2022. koje je Služba za finansije i inspekcijski nadzor zaprimila od nadležnih Općinskih službi, iznosi za kapitalne transfere su projicirani za period 2020-2022. u većim iznosima od ostvarenja iz 2018. godine.

Infrastrukturni i kapitalni projekti i razvojni programi koje Općina planira realizovati za period 2020-2022. godine su djelomično navedeni u Nacrtu dokumenta strategije razvoja Općine za period 2011-2020. Najvažniji razvojni programi iz dokumenta Nacrta strategije razvoja Općine su: Izgradnja infrastrukture sufinansiranjem projekata u nadležnosti javnih preduzeća, podrška razvoju malih i srednjih preduzeća, razvoj poljoprivredne proizvodnje i kreiranje poslovnog okruženja za privlačenje investicija. Općina će nastojati da za period od 2020-2022. započne i završi veći dio projekata koji su planirani pod svakim pojedinačnim programom i u skladu sa svojim mogućnostima i nadležnostima.

Izdaci za nabavku stalnih sredstava (ekonomski kod 821000) se uglavnom odnose na održavanje zgrade Općine i nabavku opreme a planirani su u iznosu od 96.000 KM za 2019. godinu dok su projicirani do 100.000 KM za 2022. godinu.

Izdaci za finansijsku imovinu (ekonomski kod 822000) se odnose na neraspoređeni višak prihoda i rashoda (za pokriće deficita iz prethodnih godina) koji je planiran u iznosu od 200.000 KM za 2019.godinu a projiciran je u istom iznosu od 200.000 za period 2020-2022. godinu a svrha je podmirivanje obaveza iz proteklih perioda.

Izdaci za otplate duga (ekonomski kod 823000)

Ostatak otplate kredita za 2019. godine odnosi se na kredit kod Razvojne banke za rekonstrukciju Ulice Sultan Ahmeda koja je završena u roku u 2012. godini. Otplata kredita koja uključuje i posljednju ratu kredita je planirana u iznosu od 40.000 KM za 2019. godinu.

Budžetska potrošnja po funkcionalnoj klasifikaciji (Rashodi po funkcionalnim kategorijama)

Iz pregleda rashoda po funkcionalnoj klasifikaciji vidljivo je da se najveći dio sredstava usmjerava prema aktivnostima općih javnih službi (regulisano zakonom) odnosno prema povećanju kvalitete usluga građanima kao i zaposlenju visoke i srednje stručne spreme u organu uprave. Potrošnja usmjerena prema ekonomskim, stambenim i zajedničkim poslovima je posebno značajna jer je prioritet Općine da kroz izgradnju infratrakture stvara preduslove za investicije i razvoj. Za period od 2020. do 2022. planira se realno povećanje potrošnje za sve aktivnosti u skladu sa povećanjem ukupnih prihoda Općine.

Napomena: Budžet za 2019. godinu je usvojen od strane Općinskog vijeća Bugojno u zakonskom roku odnosno u decembru 2018. godine a u skladu sa projekcijama Dokumenta okvirnog Budžeta za razdoblje 2019-2021. godine.

4.3 Pregled programa aktivnosti budžetskog korisnika, Jedinstvenog organa uprave sa potrošačkim jedinicama, za period 2020-2022. godinu

Strateški cilj budžetskog korisnika, jedinstvenog organa uprave je blagovremeno i potpuno ostvarivanje programskih aktivnosti Načelnika Općine zajedno sa potrošačkim jedinicama odnosno općinskim službama.

Tabela 7. Pregled programa aktivnosti po potrošačkim jedinicama (Načelnik i Općinske službe) za period 2020-2022.

Lista programa aktivnosti potrošačkih jedinica	Plan za 2019.	Projekcije			Nosioč aktivnosti	Izvor finansiranja
		2020.	2021.	2022.		
1. Program aktivnosti Općinskog Načelnika <u>Obuhvata:</u> troškove plaća i naknada zaposlenih, doprinose, izdatke za materijal i usluge, tekuću rezervu i izdatke za opremu	156.000	160.000	162.000	167.000	Načelnik	Vlastita sredstva
2. Program aktivnosti Stručne službe općinskog vijeća i Načelnika <u>Obuhvata:</u> troškove plaća i naknada zaposlenih, doprinose, izdatke za materijal i usluge (posebno za rad vijećnika i komisija), parlamentarne stranke, izbornu komisiju, nabavku opreme, održavanje kasarne i rekonstrukciju zgrade Općine	1.316.500	1.320.000	1.340.000	1.370.000	Sekretar općinskog vijeća i načelnika	Vlastita sredstva, sredstva sa viših nivoa vlasti, donacije
3. Program aktivnosti Službe za civilnu zaštitu. <u>Obuhvata:</u> troškove plaća i naknada zaposlenih, doprinose, izdatke za materijal i usluge, tekuće transfere (elementarne nepogode i deminiranje) i nabavku opreme	233.000	240.000	250.000	275.000	Pomoćnik načelnika	Vlastita sredstva, sredstva sa viših nivoa vlasti, donacije
4. Program aktivnosti Službe za privredu, društvene djelatnosti i opću upravu <u>Obuhvata:</u> troškove plaća i naknada zaposlenih, doprinose, izdatke za materijal i usluge, tekuće transfere-posebni programi za sport, kulturu, NVO, obrazovanje, poduzetništvo, poljoprivredu, poduzetništvo i ostalo i izdatke za opremu.	3.422.000	3.325.000	3.400.000	3.510.000	Pomoćnik načelnika	Vlastita sredstva, sredstva sa viših nivoa vlasti, donacije

5. Program aktivnosti Službe za urbanizam, građenje, geodetsko-katastarske i imovinsko pravne poslove. <u>Obuhvata:</u> troškove plaća i naknada zaposlenih, doprinose, izdatke za materijal i usluge, kapitalne izdatke i transfere i izdatke za opremu.	479.500	500.000	520.000	560.000	Pomoćnik načelnika	Vlastita sredstva, sredstva sa viših nivoa vlasti, donacije
6. Program aktivnosti Službe za stambeno komunalne poslove, obnovu i razvoj MZ <u>Obuhvata:</u> troškove plaća i naknada zaposlenih, doprinose, izdatke za materijal i usluge, tekuće transfere- posebni programi za transfere i subvencije, izdatke za nabavku stalnih sredstava (oprema), kapitalne transfere drugim nivoima vlasti, kapitalne transfere pojedincima (obnova kuća)	1.406.000	1.530.000	1.590.000	1.660.000	Pomoćnik načelnika	Vlastita sredstva, sredstva sa viših nivoa vlasti, donacije
7. Program aktivnosti Službe za finansije i inspekcijski nadzor <u>Obuhvata:</u> troškove plaća i naknada zaposlenih, doprinose, izdatke za materijal i usluge, tekuće transfere (povrat poreza), izdatke za opremu, otplatu kredita, izdatke za kamate, neraspoređeni višak prihoda i rashoda (pokriće deficita iz ranijih godina samo za 2019. godinu)	674.000	445.000	466.000	490.000	Pomoćnik načelnika	Vlastita sredstva, sredstva sa viših nivoa vlasti, donacije
8. Program aktivnosti za pokriće deficita iz ranijih godina za period 2020-2022. godinu	0	200.000	200.000	200.000	Općina Bugojno kao jed.organ uprave	Vlastita sredstva
UKUPNO	7.687.000	7.720.000	7.928.000	8.232.000		

Izvor: Služba za finansije i inspekcijski nadzor Općine Bugojno, maj 2019.

Programi aktivnosti svih potrošačkih jedinica (**tabela 7.**) čine ukupnu programsku aktivnost jedinstvenog organa uprave kao budžetskog korisnika. Potrošačke jedinice odnosno Načelnik i općinske službe, kao korisnici budžetskih sredstava, su dužni da u sklopu navedenih programskih aktivnosti izrade pojedinačne programe koji će obuhvatiti sve tekuće i kapitalne

transfere/subvencije pojedincima, udruženjima, javnim preduzećima i ustanovama klasifikovane po funkcionalnim kategorijama iz slijedećih oblasti: Opće javne usluge, odbrana, javni red i sigurnost, ekonomski poslovi, zaštita životne sredine, stambeni i zajednički poslovi, zdravstvo, rekreacija-sport, kultura i religija, obrazovanje i socijalna zaštita.

5. Mjere i preporuke za upravljanje prihodima i rashodima u Općini Bugojno

Mjere za uspješnu fiskalnu i makroekonomsku politiku Općine za period 2020-2022 :

- Restriktivna politika prema potrošnji budžetskih sredstava
- Budžetska disciplina i jačanje fiskalne odgovornosti korisnika budžetskih sredstava (potrošačkih jedinica: Načelnik i Općinske službe)
- Uvođenje trezorskog poslovanja i uspostava efikasnog internog sistema kontrole i nadzora nad utroškom sredstava svih potrošačkih jedinica
- Jačanje makroekonomske stabilnosti (važna uloga nadležnih službi, privatnog sektora, javnih preduzeća, javnih ustanova i ostalih korisnika)
- Provođenje reforme javne uprave, javnih preduzeća i javnih ustanova
- Provođenja mjera za poticanje zaposlenosti u javnom i privatnom sektoru
- Pобољшanje naplate poreznih i neporeznih prihoda
- Koordinacija i pojačane aktivnosti svih korisnika budžetskih sredstava u prikupljanju javnih prihoda sa svih nivoa vlasti
- Donošenje Odluka i drugih općih i pojedinačnih akata za uređivanje svih oblasti u skladu sa zakonima i nadležnosti Načelnika i Općinskog vijeća.
- Sprovođenje svih zakonskih i podzakonskih akata sa viših nivoa vlasti kao i usklađivanje svih pravnih regulativa općine sa važećim zakonima a koje nisu još uvijek usklađene.

Na osnovu procijenjenog okvira raspoloživih prihoda i prioriteta politika Općine s jedne strane, zatim analize objavljenih dokumenata okvirnog Budžeta sa viših nivoa vlasti i finansijskih zahtjeva korisnika Budžeta (djelomično dostavljeni od potrošačkih jedinica-

općinskih službi) s druge strane, ovim dokumentom okvirnog Budžeta Općine Bugojno predloženi su prioriteti potrošnje za naredni trogodišnji period, a u skladu s tim i početne gornje granice rashoda korisnika Budžeta za 2020., 2021. i 2022. godinu.

***Napomena:** Ograničavajući faktor za utvrđivanje predloženih prioriteta potrošnje i početnih gornjih granica rashoda je projicirani okvir raspoloživih prihoda prikazan u tabeli 5. (Projekcija prihoda, primitaka i finansiranja općine Bugojno za period 2020.- 2022. godinu).*

Pripremila:

Služba za finansije i inspekcijski nadzor Općine Bugojno

Broj: 07-14-00916-19

Bugojno, juni 2019. god.

NAČELNIK OPĆINE

Hasan Ajkunić, s.r.